

## Evening Dogri (NSD) Bulletin 16-03-2024

### आकाशवाणी

#### खास खबरां

1 भारतीय चुनाव आयोग नै 2024 दे लोकसभा चुनाव लेई तरीके दी घोषणा करी दित्ती ऐ। लोकसभा दिएं 543 सीटें लेई चुनाव 19 अप्रैल कोला पैहली जून तोड़ी 7एं गेड़ें च होग। वोटें दी गिनतरी 4 जून गी होग। एहदे कन्नै गै आदर्श आचार संहिता बी लागू।

2 सब्बने सियासी पार्टिएं लोकसभा चुनाव दे कार्यक्रम दी घोषणा दा सुआगत कीता। बीजेपी नै अपनी जित्त दा दावा कीता, कांग्रेस नै आखेआ मुखे च लोकतंत्र गी बचाने दा लोकें कश खीरला मौका।

3 प्रधानमंत्री नरेन्द्र मोदी होरें अज्ज कर्नाटक ते तेलंगाना च दऊं जन सभाएं गी संबोधत कीता। आखेआ जे 140 करोड़ लोकें दी ताकत कन्नै देश तेजिया कन्नै तरक्की बाद्धे बत्तै पर अगड़े बधै करदा ऐ।

4 सरकार नवभारत साक्षर कार्यक्रम दे तैहत बुनियादी अक्षर ते अंक ज्ञान पर आधारित FLNAT टैस्ट दा आयोजन कराग।

5 महिला प्रीमियर लीग दा फाइनल मैच कल। खताबी मकाबले च रॉयल चैलेंजर्स बेंगलोर दा मकाबला दिल्ली कैपिटल्स कन्नै होग।

<><><><><><>

### **Lok Sabha Polls**

लोकसभा चुनाव अगले म्हीने दी 19 तरीक थमां 7एं चरणें च कराए जांगन। मतगणना इस बरे 4 जून गी होग। पैहले चरण च 19 अप्रैल गी 102 लोकसभा सीटें लेई, वोट पांगन। दुए चरण च 26 अप्रैल गी 89 सीटें लेई, त्रिए चरण च 7 मई गी 94 सीटें आस्तै, चौथे चरण च 13 मई गी 96 सीटें आस्तै, 5में चरण च

20 मई गी 49 सीटें आस्तै, 6में चरण च 25 मई गी 57 सीटें आस्तै ते 7में ते खीरले चरण च पैहली जून गी 57 लोक सभा सीटें आस्तै वोट पांगन। मुख चुनां आयुक्त राजीव कुमार होरें लोकसभा चुनां ते किश राज्यें च विधानसभा चुनां दी राज्यें च विधानसभा चुनां दी तरीकें दी घोषणा करदे होई आक्खेआ जे भारतीय चुनां आयोग दी टीम, देश दे लोकतंत्र दे सब्बने शा बड्डे उत्सव लेई पूरी चाल्ली तैआर ऐ। उनें दस्सेआ जे देश च 97 करोड़ पंजीकृत मतदाता न जिंदे च 49.7 करोड़ महिला मतदाता शामिल न ते साढ़े 10 लख मतदान केन्द्रें पर डेढ़ करोड़ कर्मी तैनात होंगन। उनें दस्सेआ जे इक करोड़ 82 लख मतदाता पैहली बारी वोअ पांगन ते 25 ब'रे शा बद्ध उमर आले ते दिव्यांग वोटरें लेई घर बैठियै वोट पाने गी जकीनी बनाया जाग। वर्तमान लोकसभा दा कार्यकाल इस ब'रे 16 जून गी संभा'रदा ऐ।

<><><><><><>

## JK Polls

जम्मू कश्मीर दे 5 लोक सभा हल्कें च 19 अप्रैल, 25 अप्रैल, 7 मई, 13 मई ते 20 मई गी 5एं चरणें च मतदान होग। चुनां आयोग नै विधानसभा चुनां ते लोकसभा चुनां किट्ठे कराने थमां इंकार कीता। मुख चुनां आयुक्त होरें आक्खेआ जे शड़े 4 राज्यें सिक्किम, अरुणचल प्रदेश, आडिशा ते आंध्रप्रदेश च गै दवै चुनां किट्ठे कराए जा'रदे न। उनें दस्सेआ जे जम्मू कश्मीर च विधानसभा चुनां, लोकसभा चुनां दे बाद च होंगन, कीजे दवै चुनां कन्नै कराना सुरक्षा दी दृष्टी कन्नै ठीक नेइं ऐ ते पूरे देश च चुनां दे चलदे जम्मू कश्मीर च हर इक मेदवार गी सुरक्षा उपलब्ध कराना संभव नेईं ऐ।

<><><><><><>

## Reactions

राजनैतिक पार्टिं लोकसभा ते किश राज्य विधानसभाएं दे चुनां कार्यक्रम दी घोषणा दा सुआगत कीता ऐ। बीजेपी दे वरिष्ठ नेता ते प्रधानमंत्री नरेन्द्र मोदी होरें आक्खेआ ऐ जे बीजेपी ते एनडीए इनें चुनाएं लेई पूरी चाल्ली तैआर ऐ। इक सोशल मीडिया पोस्ट च मोदी होरें आक्खेआ जे बीजेपी सुशासन दे अपने रिकार्ड ते सब्बने क्षेत्रें च कीते गेदे कम्में दी बिनाह पर लोकें कश जाग। 10 ब'रे पैहले जिसलै उनें प्रधानमंत्री दा औहदा सांभेआ हा उसलै देश दी जनता कन्नै धोखा होए दा हा ते कोई बी क्षेत्र भ्रष्टाचार, घपले ते घोटालें कोला अनछूता नेई हा। मोदी होरें आक्खेआ ऐ एल्लै 140 करोड़ लोकें दी ताकत कन्नै मुख्य नित नमें रिकार्ड बना करदा ऐ ते नमियां उंचाइयां छूआ करदा ऐ ते मुख्य अज्ज दुनिया दी 5मीं सब्बने शा बड्डी अर्थबवस्था बनी गेदा ऐ। उनें आक्खेआ जे करोड़ें लोकें गी गरीबी कोला मुक्ति थोई ऐ ते सरकारी योजनाएं दा लाह मुख्यै दे हर इक कोने, हर दूर दरेड़े इलाकें तगर बी पुज्जा करदा ऐ। उनें आक्खेआ जे उंदे त्रीए कार्जकाल च गरीबी ते भ्रष्टाचार खलाफ लड़ाई होर मती तेज होग। बीजेपी दे राष्ट्रीय अध्यक्ष जे.पी.नड्डा होरें आक्खेआ जे चुनां लोकतंत्र दा सब्बने शा बड्डा पर्व ऐ। उनें देशवासिएं गी इस पर्व च बधी चढियै हिस्सा लैने दा आह्वान बी कीता। कांग्रेस पार्टी दे अध्यक्ष मल्लिका अर्जुन खड़गे होरें आक्खेआ ऐ जे लोकसभा चुनाएं कन्नै भारत च न्याय ते समाजी बरोबरी दे भित्त खुलगन। उनें आक्खेआ जे शायद एह मुख्यै च लोकतंत्र गी बचाने दा खीरी मौका होग। आम आदमी पार्टी दे नेता गोपाल राय होरें चुनां लेई तरीकें दी घोषणा दा सुआगत कीता ऐ ते आक्खेआ जे आम आदमी पार्टी पूरी चाल्ली तैआर ऐ ते I.N.D.I गठबंधन कन्नै पूरी ताकत कन्नै चुनां लड़ोग।

<><><><><><>

## Congress Rahul

कांग्रेस नेता राहुल गांधी होरें अज्ज बीजेपी नेतृत्व आली केन्द्र सरकार पर हमले गी तेज करदे होई चुनावी बांड स्कीम गी, सरकारां पलटने ते सियासी पार्टिएं गी जोड़ने दा इक माध्यम दस्सेआ। महाराष्ट्र दे थाने च जंभाली चाका थाहर अपनी भारत जोड़दे न्याय यात्रा च उनें आरोप लाया जे चुनां बांड स्कीम इक अंतर्राष्ट्रीय स्तर दा वसूली गिरोह ऐ जेहदा विरोध करने पर ईडी, सीबीआई ते आयकर विभाग पिच्छे लाई दित्ते जंदे न। उनें आक्खेआ जे सरकारी ते निजी खेत्तर च आबादी दे 80 फीसद हिस्से दी नुमांयदगी बड़ी घट्ट ऐ, जेहदे च पिच्छड़े तबकें, दलित, आदिवासी, अल्पसंख्यक शामिल न।

<><><><><><>

## PM-Karnatka

प्रधानमंत्री नरेन्द्र मोदी होरें लोकसभा चुनां दे दरान भ्रष्टाचार खत्म करने ते विकास आह्वाने लेई जनता कोला समर्थन मंगेआ ऐ। अज्ज कर्नाटक च इक रैली गी संबोधत करदे होई उनें आक्खेआ जे आयुष्मान भारत योजना कन्नै कर्नाटक च 80 लक्ख लोकें गी लाह पुज्जेआ ऐ ते 75 लक्ख परिवारें गी जल जीवन मिशन दे तैहत पीने आला पानी सिद्दे उंदे घरे तगर पुज्जेआ ऐ। उनें दस्सेआ जे उज्जवला योजना तैहत राज्य च 40 लक्ख कोला मती महिलाएं गी घरेलू रसोई गैस दे मुफ्त कनेक्शन होसल होए न, जिसलै जे प्रधानमंत्री आवास योजना कन्नै 8 लक्ख लोकें गी सिरै पर छत्त नसीब होआ ऐ। एहृदे अलावा हुम्नाबाद—कलबुर्गी रेल लाई ते 6 ज्हार करोड़ रपे दी लागत आली कलबुर्गी—रायचूर आली 6 लेन जरनैली सड़कै दी बी घोषणा उनें कीती। मोदी होरें कांग्रेस पर दोष लांदे होई आक्खेआ जे कर्नाटक च सरकार कनून बवस्था बनाई रखने च नकाम रेही ऐ ते उपद्रविणं दी रक्षा करा करदी ऐ।

<><><><><><>

## PM-Congress

प्रधानमंत्री नरेन्द्र मोदी होरें अज्ज आकखेआ ऐ जे भ्रष्टाचार खलाफ लड़ाई च कुसै बी भ्रष्ट नेता गी बख्खोआ नेइं जाग। उनें आकखेआ जे परोआरवादी राजनीतिक पार्टिएं च भ्राह्-भतीजावाद, भ्रष्टाचार ते तुष्टिकरण दा इक सांझा इतिहास होंदा ऐ। अज्ज तेलंगाना दे नगर कुरनूल च इक बड्डी जनसभा गी संबोधत करदे होई प्रधानमंत्री होरें बीआरएस ते कांग्रेस दी निंदेआ कीती ते आकखेआ जे इनें परोआरवादी पार्टिएं, देश गी तबाह करने दा कम्म कीता। प्रधानमंत्री होरें राज्य दे लोकें गी जकीन दोआया जे दफा-370, श्री राम मंदर ते नेयी होरनें केई चीजें आला लेखा गै उंदे कन्नै कीते गोदे सब्बनें वायदें गी बी पूरा कीता जाग। प्रधानमंत्री होरें औंदे लोकसभा चुनाएं च तेलंगाना दे लोकें दा सैहयोग मंगोआ ते आकखेआ जे ओह बिजन चिर जाए दे उंदे सब्बै मसलें हल करी देंगन।

<><><><><><><>

## NavBharat

नव भारत साक्षर कार्यक्रम दे इक हिस्से दे तौरा पर सरकार बुनियादी साक्षरता ते अकज्ञान मूलांकन टैस्ट करोआग। इस कार्यक्रम तैहत पिछले ब'रे कराई गेदी पैहली-पैहली परीक्षा च 22 लक्ख 70 जहार कोला मते शिक्षार्थिएं हिस्सा लैता हा जिसी पास करने आलेंगी साक्षर घोशत कीता गेआ हा। इस मतेयान दा मकसद मुख्यै साक्षर लोकें दी गिनतरी दा पता लाने लेई मुख्य भरै च बुनियादी साक्षरता ते सव्यात्मक मूलांकन परीक्षा FLNAT कराई जंदी ऐ जेहदे नै एह साफ पता लगदा ऐ जे किन्ने लोकें गी बुनियादी अक्षर ज्ञान, पढ़ना लिखना ते गिनतरी जां स्हाब कताब करी लैने दी छमता ऐ।

<><><><><><><>

## CDS

चीफ ऑफ डिफेंस स्टाफ जनरल अनिल चौहान होरें आकखेआ ऐ जे पाकिस्तान अज्ज भामें आर्थिक बदहाली दा सामना करा करदा ऐ पर ओहदी फौजी समर्थ ते थेआरबंद बल अजें बी भारत लेई चुनौती बने दे न। “राश्ट्री सुरक्षा: भारती सेना अग्गे मजूद चुनौतिएं” आले विशे पर आयोजित गल्लबात आले इक कार्यक्रम दरान बोलदे होई जनरल चौहान होरें आकखेआ जे भारत कश ऐसे संसाधन ते समर्थ मजूद ऐ जिंदी बदौलत अस अपने बन्नं खास करियै उत्तर भारत च विवाद आले बन्नं दी सुरक्षा जकीनी बनाइ सकने आं। 21मीं सदी च भारत अग्गे मजूद चुनौतिएं बारे पुच्छे गेदे इक सुआले पर प्रतिक्रिया दिंदे होई जनरल चौहान होरें आकखेआ जे सब्बने शा बड्डी चुनौती बाहरै थमां ऐ पर देश ओहदे कन्नै निबडने लेई पूरी चाल्ली इकजुट ऐ। उनें आकखेआ जे भारत दे दो गवांडी मुल्लख न जेहडे साढे प्रति दुश्मनी दा भाव रखदे न पर भारती फौज इस किस्मै दिएं चुनौतिएं ते खतरें कन्नै निबडना खरी चाल्ली जानदी ऐ।

<><><><><><>

## P.B.

नवनीत कुमार सहगल होर प्रसार भारती दे नमें अध्यक्ष बनी गे न। ओह भारतीय प्रशासनिक सेवा दे उत्तर प्रदेश काडर दे 1988 बैच दे सेवानिवृत अफसर न। ओ प्रसार भारती दे साबका अध्यक्ष ए.सूर्याप्रकाश हुंदी थाहर लैंगन जिंदा कार्जकाल 2020 च मुक्की गेआ हा। सहगल होरें ओहदा सांभने दे बाद मीडिया कन्नै गल्ल करदे होई आकखेआ जे आकाशवाणी दी पुज्ज भलेया दूर दरेडे इलाकें तोड़ी ऐ ते एह सूचना, जानकारी ते मनोरंजन दा बी सब्बने शा भरोसेमंद जरिया ऐ। उनें आकखेआ जे आम लोकें तगर सच्ची ते निपर्कख खबर पजाना प्रसार भारती दा कर्तव्य ऐ। उपराश्ट्रपति जगदीप धनखड़ हुंदी अध्यक्षता आली ताल कमेटी दी मंजूरी दे बाद राश्ट्रपति द्रौपदी मुर्मू होरें नवनीत कुमार सहगल हुंदी प्रसार भारती दे अध्यक्ष दे ओहदे पर नियुक्ति कीती ऐ।



## Cricket

महिला प्रीमियर लीग क्रिकेट च कल रातीं फाईनल च रॉयल चैलेंजरस बेंगलोर दा मकाबला दिल्ली कैपिटल्स कन्नै होग। महिला प्रीमियर लीग क्रिकेट च रॉयल चैलेंजर बेंगलोर नै इक रोमांचक मकाबले च 5एं रंजें कन्नै मुंबई इंडियनस गी हराइयै फाइनल च थाहर बनाई। एह मैच जंदी रातीं दिल्ली दे अरुण जेटली स्टेडियम च खेड्देआ गेआ। इक सौ 36 रंजें दा पीछा करदे होई मुंबई इंडियनस दी टीम तैहशुदा 20 ओवरें च 6 विकटें दे नुकसान पर 130 रंज गै बनाई सकी। एहदे थमां पैहले रॉयल चैलेंजर बेंगलोर नै पैहले बल्लेबाजी करदे होई 20 ओवरें च 6 विकटें दे नुकसान पर 135 रंज बनाए।



## America-Cyclone

अमरीका च कल रातीं आए दे जबरदस्त चक्रवाती तूफान च घट्टोघट्ट त्रऊं जनें दे मारे जाने दी खबर ऐ। अमरीका दे बक्ख-बक्ख प्रांतें च इस तूफान दा असर दिक्खने गी लब्धा ऐ ते एहदे करी केई घरे मकानें ते बपारिक संस्थानें गी नुकसान पुज्जा ऐ। अधिकारिएं शैका जताई ऐ जे मरोने आलें दी गिनतरी बधी बी सकदी ऐ। अधिकारिक जानकारी मूजब एह त्रै मौतां ओहाओ दे लोगान काउंटी च होइयां न। तूफान कारण केटुंकी, इडियाना ते अर्कासस च बी नुकसान होआ ऐ। इलिनोइस ते मिसौरी च बी काफी माली नुकसान होने दी जानकारी हासल होइ ऐ। उत्थूं दे मौसम विभाग मूजब दक्खनी इलाके च मौसम दे होर खराब होने दी पेशगोई कीती गेदी ऐ।



## K.Kavita ED

दिल्ली दी इक अदालतै बीआरएस दी नेता के.कविता गी दिल्ली आबकारी नीति मामले च 23 मार्च तगर ईडी दी हिरासतै च भेजी दित्ता ऐ। निदेशालय नै सुश्री कविता गी कल गिरफ्तार कीता हा। ईडी नै कविता लेई 10एं दिनें दी रमांड मंगी ही। उंदे पर दिल्ली आबकारी नीति मामले च आम आदमी पार्टी दे बड्डे नेताएं कन्नै मिलियै साजश रचने दा आरोप ऐ।

<><><><><><>

## Telangana Teachers

तेलंगाना राज्य सरकार नै सरकारी टीचरें ते कर्मचारिएं दिएं समस्याएं दी जांच ते नबेड़ा करने लेई सरकार दी सलाह देने आस्तै त्रै मिंबरी कमेटी दा गठन कीता ऐ। मुखमंत्रि ए रेवंत रेड्डी होरें कर्मचारिएं दिएं युनियनें आस्सेआ पेश यात्रिकाएं ते ज्ञापनें दी समीक्षा करने दे बाद एह गैह पुट्टी ऐ। कमेटी दी अध्यक्षता राज्य योजना बोर्ड दे उपाध्यक्ष जी.चिन्न रेड्डी करगंन। तेलंगाना जायंट एक्शन कमेटी दे अध्यक्ष ते साबका प्रोत्र कोदंडराम ते भारतीय प्रशासनिक सेवा दिएं अफसर दिव्या गी एहदे मिंबर दे रूपै च नियुक्त कीता गोआ ऐ। पिछले हफते मुखमंत्रि होरें सरकारी मलाजमें ते टीचरें दिएं युनियनें कन्नै विशेष बैठक लाई ही ते परिसंघ दे गतिविधिएं आस्सेआ पेश कीती गेदी सब्बने दलीलें पर ध्यान देने ते उंदे मसलें दा नबेड़ा करने दा भरोसा दोआया हा।

<><><><><><>

## Centre Ban

केन्द्र सरकारै जम्मू कश्मीर पीपुल्स फ्रीडम लीग ते ओहदे सब्बनें गुटें गी अगले 5एं बरें लेई गैर कनूनी संगठन घोषत करी दितता ऐ। एहदे अलावा केन्द्र सरकार नै जम्मू कश्मीर लिब्रेशन फ्रंट—जेकेएलएफ दे मोहम्मद यासीन मलिक गुट पर बंदिश गी बी होर 5एं बरें लेई बधाई दित्ता ऐ। केन्द्री गृहमंत्रि अमित शाह



होरें सोशल मीडिया मंच—एक्स पर इस फैसले दी घोषणा कीती ते आक्खेआ जे आतंकवादी गतिविधिएं च शामिल लोकें ते संगठनें गी मोदी सरकार कुसा कीमत पर नेई बख्शोग। शाह होरें आक्खेआ जे एह संगठन आतंकवाद दे राएं जम्मू कश्मीर च अलगाववाद गी बढ़ावा देइयै भारत दी अखंडता लेई खतरा बने दे न। गृहमंत्री होरें आक्खेआ ऐ जे मोदी सरकार आतंकवाद गी जड़ थमां पुट्टी सुट्टने लेई वचनबद्ध ऐ।

<><><><><><>